

SHAKAWN KUNGDAWN 27

1. Yehowa gaw nye a nhtoi hte hkyehkrang la ai lam rai nga ai, Kadai wa hpe ngai hkrit nga n ta? Yehowa gaw nye a asak shingbyi shara rai nga ai, Ngai kadai wa hpe hkrit kajawng na rai nga a ta?
2. Nye a hkumshan sha na, n hkru ai ni sa wa nna, Ngai hpe zingri ai ni hte gumlau ni, ni wa ma jang, Shanhte ahtu kataw nna hkrat mat ma ai.
3. Luksuk ni nye a man e dap jung nga ma timung, Nye a myit hpa n hkrit li ai; Majan pruwaw nga timung, Dai hta she nye a myit grin nga na ra ai.
4. Lam langai mi ngai Yehowa hpe hpyi se ai: Ngai ahkrung nga ai nhtoi hte ting, Yehowa a nta hta nga nga lu nna, Yehowa a tsawm pra ai mu lu na hte, Shi a Htingnu e myit htang nga na, ngai ra nga nngai.
5. Shi gaw ruyak ai nhtoi hta shi a npan e ngai hpe makoi da ni ai; Shi sum a shingbyi shara hta ngai hpe magap da nngai: Lungkrung ntsa e, shi ngai hpe shadun da ni ai.
6. Ya shi gaw, grupyin e nga ai, ngai hpe gumlau ai ni a ntsa e, Nye a baw hpe, sharawt ya ni ai. Shi a sum hta pahtau dum let ngai hkungga jaw na nngai. Ngai Yehowa hpe mahkawn mangoi nna, tingse dum na nngai.
7. Yehowa e, ngai jahtau yang, madat mara ya e, Ngai hpe matsan dum nna htan ya e.
8. “Nye a myiman hpe tam mu,” nga nna, nye a myit masin hpe tsun ndai majaw, Yehowa e, na a myiman hpe ngai tam nga nngai.
9. Na a myiman ngai kaw na hkum makoi kau u; Masin pawt ai hte na a mayam wa hpe hkum kau da et: Ngai hpe karum ai wa nang rai nga nit dai; Ngai hpe hkyehkrang la ai Karai Kasang e, Ngai hpe hkum gangkau et, ngai hpe hkum jahti da et.
10. Nye nu wa ni ngai hpe jahka kau raitimung, Yehowa ngai hpe pawn la na nngai.
11. Yehowa e, na a lam ngai hpe madun ya e, Ngai hpe gyam yu ai ni a majaw, malang ai hku hta ngai hpe woi wa e.
12. Kashun kashe maw ai ni hte, N teng n man ai sakse ni nye a man e rawt nga ma ai majaw, Gumlau ni ra ai lam hta ngai hpe hkum ap kau da et.
13. Hkrung nga ai ni a shara hta e, Yehowa a kaja htum ai hpe ngai naw mu lu na nngai, ngai n kam taw gaw, myit htum ni ai.
14. Yehowa hpe myit mada nga u; Dakan nga nna, na a myit dakring nga u: Rai sa, Yehowa hpe myit mada nga u ga law.